



## 愛好先、細義兜

逐擺愛出門個時節，爺哀總係會再三交代佢，愛好先、細義兜；等自家做人爺哀咧，子女愛出門個時節，佢乜當自然會再三交代佢兜，愛好先、細義兜。做爺哀個會輒輒講出這兩句話，係對子兒個關心，也係對屋下人出外個愁慮，見擺想著子女愛出門，做人爺哀個總係會愁一下交通有安全無？生活有平安無？讀書、做事有順序無？毋知有堵著麼個困難摻危險無？這種愁慮，一直愛睺著子女轉屋，無斯接著電話聽著聲，大家正會寬心。頭擺，長輩愛出遠門前，會先去廳下摻阿公嬭行下禮，講愛出門咧，請保佑一下，等轉到屋下，乜係會先到廳下摻阿公嬭行下禮，講自家平安轉到咧，承蒙保佑！其實，人出外做得平安轉屋，除忒祖上有保佑以外，最重要個還係自家有細心細義，無發生意外。

毋過，話講轉來，出門想愛平安轉屋，有時節單淨倚恃自家好先、細義還係毋罈，像人還愛加兜運數樣，成時，佢睺著火車撞著、飛行機跌下來個交通意外，心肝肚就會盡艱苦，想仰會有兜人恁無運，連想平安轉到屋下就無法度！該愛仰結煞正好？係人出門愛睺運數，該愛仰般做頭路？敢有人毋使出門个？佢想「平安」這隻問題係歸隻社會個問題，毋係自家好先、細義就做得，愛所有人共下來好先、細義，大家正會有正經个「平安」。

現代个社會系統分工當幼，逐儕管理一小部分个工作定定，若係系統愛運轉順利，定著愛大家同心合力正有法度，係當中有人儘儘採採、無顧好本分、無好先，該就有可能會造成大事故，清明節前，花蓮港火車撞著工程車个意外就係一隻最清楚个例仔。該個做工程个人，操作機器一下無堵好，嘎害工程車貶到鐵支路面，包尾駛來个火車完全擋毋掣，正正撞落去，害火車偏走又撞著暗窿，結果四十九儕个人生就恁樣形提早結束忒，實在有冤枉啊！係講工程有照規定來進行，工人做事有好先、監工有細義，該仰有可能會發生恁大个人禍呢？係管理系統有細義來運轉，發揮治理个作用，相信這種恁衰過个事件就會少忒盡多。

一隻先進个社會，係安全又適合人過生活个社會，毋係斯會用收入來斷定人个價值，還愛講究道德，提升對人个尊重。愛變成進步个公民社會，就愛從個人个「愛好先」提升到對社會个「細義兜」，自家愛重視自身个安全以外，還愛有尊重別儕性命个態度，會照等法律摻規定來做事，確確實實執行負責个工作、盡本分，做毋得有兼涉自家事情就當好先，對公眾事務就隨便來个自私想法，係大家對「公」非常細義，該恁个「私」就會還較有保障。

作者：林伯殷

### ☆詞彙學習☆

【好先】ho` sien`：小心。

【細義】se` ngi`：小心注意。

【輒輒】ziab ziab：時常。

【愁慮】seu li`：憂慮、顧忌。

【順序】shun` si`：順利。

【倚恃】rhi` shi`：信任依賴。

【運數】vin` sii`：運氣。

【儘儘採採】cin` cin` cai` cai`：隨隨便便。

【擋毋掣】dong` m chad`：煞車不及。

【暗窿】am` lung：暗而無光的隧道。

【兼涉】giam` shab：關涉。